

RESOLUCIÓN REITORAL DE 12 DE XUÑO DE 2023 DE CONCESIÓN DIRECTA DE BOLSA SANTANDER ERASMUS AO ALUMNADO SELECCIONADO NO MARCO DA CONVOCATORIA DE PRAZAS DE INTERCAMBIO ERASMUS+ ESTUDOS NO CURSO 2023-24

En virtude do Programa “Bolsas Santander Erasmus”, convocatoria 2023-2024, financiaranse 24 bolsas, 2 de 1.000 euros e 22 de 500 euros, ao estudantado que realice unha estadía Erasmus+ Estudos durante o curso 2023-2024.

O alumnado ao que vai destinado esta axuda complementaria xa foi seleccionado a través dunha convocatoria de concorrencia competitiva de prazas Erasmus+ Estudos para o curso 2022-2023, polo que non é necesaria a convocatoria dun novo procedemento de concorrencia.

É polo que, vista a Lei 9/2007 de subvencións de Galicia, as disposicións aplicables da Lei 38/2003, do 17 de novembro, xeral de subvencións e as súas normativas de desenvolvemento, en virtude das facultades que lle outorgan a Lei orgánica 2/2023, de 22 de marzo, do sistema universitario e o artigo 72 do Decreto 13/2019, do 24 de xaneiro, polo que se aproban os estatutos da Universidade de Vigo, esta reitoría

RESOLVE:

Primeiro: Publicar, nos anexos II e III, **as listaxes provisionais de concesión e de agarda de 2 bolsas de 1000 € e 22 bolsas de 500 €,** entre o alumnado que obtivo unha praza no marco da convocatoria do programa Erasmus+ Estudos para o curso 2023-24, segundo a resolución reitoral do 22 de marzo de 2023.

Segundo: Publicar as bases reguladoras que rexen estas axudas complementarias Santander Erasmus no [taboleiro electrónico da sede electrónica da Universidade de Vigo](#) e no [Portal de bolsas](#) da páxina web da Universidade de Vigo.

Terceiro: Abrir o **prazo de reclamacións ás listaxes provisionais**, nos termos previstos no artigo 3º das bases reguladoras publicadas no anexo I.

Contra esta resolución poderase interpoñer recurso potestativo de reposición perante o reitor no prazo dun mes (Lei 39/2015, do 1 de outubro) e/ou recurso contencioso administrativo perante a xurisdición contencioso-administrativo, no prazo de dous meses (Lei 29/1998, de 13 de xuño). Os prazos empezan a contar dende o día seguinte á recepción desta notificación. No caso de interpoñer recurso polas dúas vías, é preciso esperar a resolución expresa ou presunta do de reposición.

Vigo, na data da sinatura electrónica

O reitor

Por delegación R.R. 22/06/2022 (DOG 06/07/2022)

A vicerreitora de Internacionalización

Mª Isabel del Pozo Triviño

ANEXO I

BASES QUE REGULAN AS BOLSAS SANTANDER ERASMUS PARA O ALUMNADO CON PRAZAS ERASMUS+ ESTUDOS PARA O CURSO 2023-24

1. OBXECTO

A finalidade da bolsa é contribuír a financiar o custo da estadía na universidade de destino do alumnado no marco da convocatoria de prazas do programa Erasmus+ Estudos, curso 2023-24, garantindo que o alumnado con escasos recursos económicos poida acceder aos programas de intercambio académico.

2. REQUISITOS

- Estar matriculado/a no curso 2022-23 en centros propios da Universidade de Vigo ou en centros adscritos de titularidade pública no caso do alumnado de titulacións que non se imparten en centros propios (Enfermaría Ourense, Enfermaría Pontevedra e Enfermaría Meixoeiro da Universidade de Vigo).
- Ter adxudicada unha praza Erasmus + Estudos concedida pola resolución reitoral de 22 de marzo de 2023.
- Non ter concedida unha bolsa Santander Erasmus en convocatorias anteriores.
- Estar inscrito na web <http://www.becas-santander.com>, na convocatoria “Becas Santander Erasmus” do curso 2023-24

3. PROCEDEMENTO DE CONCESIÓN

3.1. Concesión provisional: publicación das listaxes provisorias e prazo de emenda e alegacións

A selección realizarase baseándose na media do expediente ponderada que se calcula dividindo a media do expediente do/da alumno/a a 28 de febreiro de 2023 entre a nota media das persoas tituladas do curso 2021-22 de cada titulación. De non existir datos de persoas tituladas dunha titulación, tomarase a nota media por ámbito de estudos xeral de acordo cos datos ofrecidos pola Clasificación Internacional Normalizada da Educación (ISCED).

Aplicaranse os seguintes **criterios**, ata o esgotamento do crédito orzamentario:

➤ Dúas bolsas de 1.000 €:

Estas 2 axudas concederanse seguindo esta orde de prelación:

- 1.- Concederase unha axuda ao/á estudante coa maior nota media ponderada que xustifique unha discapacidade igual ou superior ao 33 %.
- 2.- Concederase a segunda axuda ao/á estudante coa maior nota media ponderada.
- 3.-No caso de non haber ningunha solicitude de estudantado con discapacidade, a axuda concederase ao estudantado coa maior nota media ponderada que teña a condición de ser bolseiro/a MEFP no curso 2022-23.

➤ Vinte e dúas bolsas de 500 €:

Concederanse ao estudantado coa maior nota media ponderada.

A renuncia ás bolsas de 1.000 euros dará lugar a concesión á persoa con bolsa de 500 euros con maior nota media ponderada que cumpra os requisitos. A renuncia ás bolsas de 500 euros dará lugar á concesión á seguinte persoa da lista de agarda.

Realizada a selección pola Oficina de Relacións Internacionais (ORI), publícase no anexo II a lista provisoria de bolsas concedidas e, no anexo III, a lista provisoria de agarda para o caso de que se produzan renuncias.

As persoas interesadas poderán presentar alegacións no prazo de **10 días hábiles**, contados a partir do día seguinte á publicación desta resolución a través da sede electrónica da Universidade de Vigo (<https://sede.uvigo.gal>) mediante [instancia xenérica \(SXER\)](#) dirixida á ORI.

3.2. Revisión de alegacións e publicación da listaxe definitiva

Unha vez revisadas as alegacións, publicarase a resolución coa listaxe definitiva de axudas concedidas e a listaxe de agarda.

Non poderá ter a condición de beneficiario a persoa na que concorran algunha das circunstancias establecidas no artigo 13.2 da lei 38/2003, de 17 de novembro, xeral de subvencións.

4. INCOMPATIBILIDADES

A bolsa é compatible con calquera outra bolsa ou axuda obtida para a realización da mobilidade e en concreto coa bolsa Erasmus+, coa bolsa do MEFP e a bolsa de axudas complementarias da Xunta de Galicia para realizar estadias en países participantes no programa Erasmus+.

A bolsa é incompatible con calquera outra bolsa promovida por entidades bancarias distintas ao Banco Santander ou do propio Banco Santander.

O importe das axudas en ningún caso poderá ser de tal contía que, de xeito illado ou en concorrencia con outras subvencións, axudas, ingresos ou recursos supere o custo da actividade subvencionada segundo establece o artigo 19.3 da Lei 38/2003 de 17 de novembro, xeral de subvencións.

5. DOTACIÓN E PAGAMENTO

As axudas consistirán en **2 bolsas de 1.000 €** cada unha e **22 bolsas de 500 €** cada unha.

Os fondos destinados a esta axuda complementaria irán con cargo á aplicación orzamentaria 2023ORI1121DORI482.10 e o importe máximo do crédito orzamentario retido para esta convocatoria ascende a 13.000,00 € para o que se achega o correspondente certificado de existencia de crédito.

O pago desta bolsa efectuarase tras a incorporación do alumnado á universidade de destino, unha vez recibido na ORI o certificado de chegada. O pago realizarase mediante transferencia bancaria á conta do Banco Santander indicada polo estudantado da que deberá ser titular.

6. ACEPTACIÓN E RENUNCIAS

As persoas beneficiarias das bolsas deberán aceptar ou renunciar á bolsa na plataforma do Santander.

As renuncias darán lugar á concesión a seguinte persoa da lista de agarda.

7. OBRIGAS DO BENEFICIARIO

A persoa adxudicataria das bolsa quedará obrigada a cumprir coas obrigas que establece a convocatoria de prazas Erasmus+ Estudos para o curso 2023-2024, convocada por resolución reitoral de 16 de novembro de 2022.

Ademais, a persoa beneficiaria debe cumprir as obrigas recollidas no artigo 14.1 da lei 38/2013, de 17 de novembro, xeral de subvencións, que lles sexa de aplicación.

8. XUSTIFICACIÓN

Trala finalización do período de intercambio, deberá achegar a certificación de estadia.

9. REVISIÓN DA AXUDA E PERDA DO DEREITO DE COBRO

A concesión desta bolsa pode ser revogada ou declararse a perda do dereito de cobro no caso de incorrer nalgún dos seguintes motivos, o cal suporá que a persoa beneficiaria reintegre as cantidades incorrectamente aboadas:

- Non cumprir os requisitos e obrigas recollidos na convocatoria.
- Ocultar datos, alteralos ou manipular a información solicitada.
- Perda da condición de universitario/a, durante todo o período de goce da bolsa.
- Incorrer nalgunha das causas de incompatibilidade que se establecen nesta convocatoria.

10. TRANSPARENCIA

De conformidade co artigo 17 da Lei 1/2016, do 18 de xaneiro, de transparencia e bo goberno, e co artigo 15 da Lei 9/2007, do 13 de xuño, de subvencións de Galicia, a Universidade de Vigo publicará na súa páxina web oficial a relación das persoas beneficiarias e o importe das axudas concedidas, así como as sancións que puideren impoñerse, polo que a presentación da solicitude leva implícita a autorización para o tratamento necesario dos datos das persoas beneficiarias e a referida publicidade.

En virtude do disposto no artigo 4 da Lei 1/2016, do 18 de xaneiro, de transparencia e bo goberno, as persoas físicas e xurídicas beneficiarias de subvencións están obrigadas a subministrar á Universidade de Vigo, logo de requirimento, toda a información necesaria para o cumprimento por aquela das obrigas previstas no título I da devandita lei. Porén, non será necesaria a publicación cando o órgano concedente xulgue que se dan as previsións do artigo 15.2.d) da Lei 9/2007, do 13 de xuño, de subvencións de Galicia.

11. PROTECCIÓN DE DATOS

A información sobre a política de protección de datos está dispoñible no [Portal de bolsas](#).